

流洶湧舟人每為之震聳又有三山磯三峰聯峙於岸其峻秀可觀是夕風雨橫江艤舟於岸逮中夜而作

初三日晚至和尚港其港遶山周回首尾通江僅百餘步港之兩岸柳陰茅屋豚柵雞埭儼然如市次至黃蓬磯獨一山枕於江岸又之響糠硿磯有觀音洞又南之雲頭磯雲峰侵冲漠狂瀾回注舟子莫能支沿崖而擗者蟻附又之驚兒磯山青雲白耕牧雜然於下有政平訟理之氣象又之望夫磯其山連亘僅一里怪石巉巖